

15 DEC 1998

Asean-Kemboja/I

ASEAN AKAN ADAKAN UPACARA KHAS TERIMA KEMASUKAN KEMBOJA

Oleh: E.Sivabalan

HANOI, 15 Dis (Bernama) -- Pemimpin-pemimpin Persatuan Negara-negara Asia Tenggara (Asean) yang menghadiri sidang kemuncak ke-enam mereka di sini bersetuju untuk menerima Kemboja sebagai anggota ke-10 kumpulan itu.

Mereka telah mengarahkan menteri-menteri luar masing-masing untuk menganjurkan satu majlis khas penerimaan masuk di sini, kata Perdana Menteri Vietnam Phan Van Khai.

Keputusan itu akan merealisasikan visi 10 anggota Asean (merangkumi kesemua 10 negara di rantau ini), katanya semasa merasmikan sidang kemuncak itu di sini hari ini.

Asean, kini terdiri daripada Brunei, Indonesia, Laos, Malaysia, Myanmar, Filipina, Singapura, Thailand dan Vietnam.

"Ekoran daripada pertukaran pendapat secara terbuka, para pemimpin Asean mencapai keputusan untuk menerima masuk Kemboja sebagai anggota Asean yang ke-10," katanya.

Khai, bagaimanapun tidak menyatakan bila majlis khas penerimaan masuk Kemboja itu akan diadakan.

Para pemimpin berkenaan membincangkan kemasukan Kemboja pada majlis jamuan malam tidak formal di sini malam tadi tetapi tidak mencapai persetujuan untuk menerima masuk Phnom Penh pada sidang kemuncak dua hari mereka di sini.

Tarikh bagi upacara khas untuk menerima kemasukan Kemboja itu masih belum ditetapkan tetapi menurut seorang daripada pegawai Asean, ia akan diadakan dalam jangka masa dua hingga empat minggu lagi.

Khai berkata kemasukan Kemboja akan mempertingkatkan kekuatan dan kedudukan antarabangsa Asean serta sumbangannya terhadap pengukuhan keamanan, mempertingkatkan kerjasama dan menggalakkan pertumbuhan di Asia Tenggara.

"Ini adalah sidang kemuncak Asean terakhir pada abad ini, ketika kita membuat persediaan untuk membawa Asean ke alaf baru.

"Ia juga menandakan satu langkah penting dalam perkembangan persatuan kita dan merupakan sidang kemuncak pertama yang mencapai realiti visi Asean untuk dianggotai oleh seluruh rantau Asia Tenggara, sebuah persatuan Asia Tenggara, oleh Asia Tenggara dan bagi Asia Tenggara," katanya.

Perdana Menteri Datuk Seri Dr Mahathir Mohamad dalam ucapan pembukaannya berkata Malaysia mengalu-alukan keanggotaan Kemboja ke dalam Asean.

Dalam ucapan pembukaannya, Presiden Indonesia B.J. Habibie turut memperkatakan perkara yang sama. Katanya Indonesia turut menyambut baik Phnom Penh ke dalam keluarga Asean sebagai anggota penuh.

"Dengan kesemua 10 negara Asia Tenggara dalam lingkungan Asean, visi pemimpin pengasas bagi Asia Tenggara yang bersatu dan aman sesama mereka dan dengan seluruh dunia telah tercapai," kata Habibie.

Habibie berkata Asean mencapai kekuatan sepenuhnya ketika ia memerlukan semua tenaga dihimpunkan.

-- BERNAMA

ES RHM RON